

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**  
**DARIPADA : DATUK RAIME BIN UNGGI**  
**TARIKH : 6.3.2018**  
**SOALAN : NO. 29**

**Datuk Raime Bin Unggi [ Tenom ] minta MENTERI PENDIDIKAN TINGGI menyatakan :-**

(a) Mengapa tidak ada tertera atau tertulis syarat kemasukan Diploma Kolej Vokasional yang diiktiraf Agensi Kelayakan Malaysia (MQA) pada setiap permohonan ke universiti awam teknikal, UiTM, Politeknik, Kolej Poly-Tech MARA dan universiti swasta teknikal lain; dan

(b) setakat mana isu pusat pentauliahan swasta Jabatan Pembangunan Kemahiran seluruh negara berdepan kekurangan kuota pinjaman pelatih menyebabkan pusat-pusat pentauliahan mengalami kerugian.

**JAWAPAN**

(a) Tuan Yang di-Pertua,

Untuk makluman Ahli Yang Berhormat, Agensi Kelayakan Malaysia (MQA) tiada halangan bagi graduan Diploma Vokasional Malaysia (DVM) yang ingin melanjutkan pengajian ke IPT dengan syarat:

(a) Kelayakan Sijil Vokasional Malaysia (SVM) memenuhi kesetaraan 3 kredit Sijil Pelajaran Malaysia (SPM) seperti yang ditetapkan oleh Lembaga Peperiksaan, Kementerian Pendidikan Malaysia; dan

- (b) Kelulusan mata pelajaran tertentu di peringkat SPM seperti Matematik / Sains / Bahasa Inggeris yang ditetapkan di dalam Surat Kelulusan Pengendalian Program dan Badan Profesional yang berkaitan.

Di samping itu, bagi permohonan kemasukan ke Universiti Awam, pemohon perlu memenuhi kriteria yang ditetapkan termasuk Syarat Am Universiti dan Syarat Khas Program Pengajian serta tertakluk kepada keputusan Senat Universiti masing-masing.

Untuk makluman Ahli Yang Berhormat, kemasukan pelajar ke Kolej Poly-Tech Mara (KPTM) adalah di bawah seliaan Kementerian Luar Bandar dan Wilayah. KPTM Bangi dan Kolej Universiti Poly-Tech MARA Kuala Lumpur (KUPTM) menawarkan pengajian dalam bidang Ijazah Sarjana Muda dengan kelayakan minimum Diploma atau Sijil Tinggi Pelajaran Malaysia atau yang setaraf dengannya. Justeru, graduan DVM adalah layak memohon untuk melanjutkan pengajian di KUPTM memandangkan ia adalah setaraf dengan lain-lain kelayakan yang diiktiraf setara oleh Kerajaan.

Soalan (b)

Untuk makluman Ahli Yang Berhormat, mengenai isu pusat pentauliahan swasta Jabatan Pembangunan Kemahiran ianya adalah di bawah bidang kuasa Kementerian Sumber Manusia. Perbadanan Tabung Pembangunan Kemahiran (PTPK) menerima peruntukan Pembangunan pada tahun 2018 sebanyak RM175 juta, peruntukan ini adalah kurang RM25 juta daripada tahun sebelumnya. Namun demikian, bagi memenuhi permohonan dan membiayai pinjaman Latihan Kemahiran (PLK) kepada

lebih ramai pelatih bagi tahun 2018, PTPK telah meluluskan dana tambahan sebanyak RM50 juta daripada wang kutipan bayaran balik pinjaman. Ini merupakan Dana Pusingan (Revolving Fund) yang boleh digunakan semula untuk membiayai PLK kepada lebih ramai pelatih. Dengan ini, jumlah peruntukan pembangunan pada tahun 2018 kepada pelatih yang layak adalah sebanyak RM225 juta. Oleh itu, ianya dapat mengatasi kekurangan kuota pinjaman kepada pelatih. Kelulusan pengagihan kuota ini adalah berdasarkan kepada keputusan Penarafan Bintang (Star Rating) yang dikeluarkan oleh Jabatan Pembangunan Kemahiran (JPK). Bagi tahun 2018, hanya PL Swasta yang menerima penarafan bintang 3, 4 dan 5 sahaja yang akan dipertimbangkan kelulusan kuota oleh PTPK. Penarafan bintang ini dilakukan oleh JPK untuk memastikan kualiti latihan adalah seperti yang ditetapkan oleh pihak JPK.

**SOALAN : 30**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN GOOI HSIAO LEUNG [ ALOR SETAR ]**

**TARIKH : 6 MAC 2018**

**RUJUKAN : 10538**

**PERTANYAAN:**

**Tuan Gooi Hsiao Leung [ Alor Setar ] minta MENTERI DALAM NEGERI menyatakan untuk mengesahkan tarikh Datuk Seri Anwar Ibrahim akan dibebaskan berdasarkan remitan satu pertiga hukumannya yang beliau berhak di bawah undang-undang, adalah pada 8 Jun 2018.**

**JAWAPAN:**

**Tuan Yang Di Pertua,**

**Pengiraan tempoh hukuman, remitan dan tarikh pembebasan seseorang banduan termasuk Dato' Seri Anwar Ibrahim dibuat oleh Jabatan Penjara mengikut ketetapan Akta Penjara 1995 serta Peraturan-Peraturan Penjara 2000. Akta dan Peraturan Penjara memperuntukkan sepertiga remitan daripada hukuman kepada mana-mana banduan yang menjalani hukuman melebihi satu bulan. Sekiranya pembebasan banduan jatuh pada hari kelepasan mingguan atau hari kelepasan am, banduan tersebut hendaklah dibebaskan pada hari sebelumnya.**

**Oleh itu, bagi pengiraan hukuman dan remitan sepertimana ketetapan Akta serta Peraturan Penjara, tarikh pembebasan Dato' Seri Anwar Ibrahim adalah pada 10 Jun 2018 (Ahad) tetapi hari sebelumnya adalah hari Sabtu, maka Dato' Seri Anwar Ibrahim boleh dibebaskan pada 8 Jun 2018 (Jumaat).**

**Walau bagaimanapun, hukuman dan tarikh pembebasan seseorang banduan boleh berubah jika banduan melakukan kesalahan tatatertib penjara dan menyebabkan tindakan pelucuthakan remitan di bawah Peraturan-Peraturan Penjara 2000.**